

ATODLEN 4

Rheoliad 7(4)

Cofrestru amrywogaethau

Dehongli

1. Yn yr Atodlen hon—

ystyr “Cyfarwyddeb 2001/18/EC” (“*Directive 2001/18/EC*”) yw Cyfarwyddeb 2001/18/EC Senedd Ewrop a’r Cyngor ar ryddhau’n fwriadol i’r amgylchedd organeddau a addaswyd yn enetig a diddymu Cyfarwyddeb y Cyngor 90/220/EEC(1);

ystyr “gwahanol” (“*distinct*”) yw bod yr amrywogaeth yn amlwg yn wahanol, oherwydd un neu ragor o nodweddion sy’n deillio o genoteip penodol neu gyfuniad o genoteipiau, i unrhyw amrywogaeth arall y mae ei bodolaeth yn hysbys i bawb ar adeg y cais i gofrestru yn amrywogaeth;

ystyr “protocol priodol” (“*appropriate protocol*”) yw—

- (a) protocol a gyhoeddir gan Gyngor Gweinyddol Swyddfa Amrywogaethau Planhigion y Gymuned mewn perthynas â phrofion gwahanolrwydd, unffurfedd a sefydlogrwydd ar gyfer y genws penodol neu’r rhywogaeth benodol o dan sylw; neu
- (b) pan na fo protocol wedi ei gyhoeddi ar gyfer y genws perthnasol neu’r rhywogaeth berthnasol, canllawiau a lunnir gan UPOV mewn perthynas â chynnal profion gwahanolrwydd, unffurfedd a sefydlogrwydd; neu
- (c) pan na fo’r protocolau a grybwyllir ym mharagraff (a) na’r canllawiau a grybwyllir ym mharagraff (b) yn bodoli, protocol neu ganllawiau a sefydlir gan Weinidogion Cymru mewn perthynas â’r un materion;

ystyr “Rheoliad (EC) Rhif 1829/2003” (“*Regulation (EC) No 1829/2003*”) yw Rheoliad (EC) Rhif 1829/2003 Senedd Ewrop a’r Cyngor ar fwyd a bwyd anifeiliaid wedi eu haddasu’n enetig(2);

ystyr “sefydlog” (“*stable*”) yw bod nodweddion yr amrywogaeth, sydd wedi eu cynnwys yn yr archwiliad gwahanolrwydd, yn ogystal ag unrhyw nodweddion eraill a ddefnyddir ar gyfer y disgrifiad o’r amrywogaeth, yn parhau yn ddigyfnewid ar ôl lluosogi mynych neu, yn achos microluosogi, ar ddiwedd pob cylch o’r fath;

ystyr “unffurf” (“*uniform*”), yn amodol ar yr amrywiadau y gellir eu disgwyl yn sgil nodweddion penodol ei lluosogi, yw bod yr amrywogaeth yn ddigon unffurf o ran y nodweddion hynny sydd wedi eu cynnwys yn yr archwiliad gwahanolrwydd, yn ogystal ag unrhyw nodweddion eraill a ddefnyddir i ddisgrifio’r amrywogaeth.

Cais i gofrestru â disgrifiad swyddogol

2.—(1) Rhaid i gais i gofrestru amrywogaeth â disgrifiad swyddogol gael ei wneud yn ysgrifenedig i Weinidogion Cymru ym mha bynnag ffurf sy’n ofynnol gan Weinidogion Cymru.

(2) Rhaid i’r canlynol fynd gyda chais—

- (a) unrhyw wybodaeth dechnegol (megis, ond heb fod yn gyfyngedig i, fanylion y genws a’r rhywogaeth y mae’r amrywogaeth yn perthyn iddynt, ei henw cyffredin, manylion y ceisydd, ac enw, tarddiad a nodweddion yr amrywogaeth) sy’n ofynnol o dan brotocol priodol sy’n berthnasol i’r rhywogaeth;

(1) OJ Rhif L 106, 17.4.2001, t. 1, fel y’i diwygiwyd ddiwethaf gan Gyfarwyddeb (EU) 2015/412 (OJ Rhif L 68, 13.3.2015, t. 1).

(2) OJ Rhif L 268, 18.10.2003, t. 1; fel y’i diwygiwyd ddiwethaf gan Rheoliad (EC) Rhif 298/2008 Senedd Ewrop a’r Cyngor (OJ Rhif L 97, 9.4.2008, t. 64).

- (b) gwybodaeth ynghylch a yw'r amrywogaeth wedi ei chofrestru'n swyddogol mewn man arall yn y Deyrnas Unedig neu mewn Aelod-wladwriaeth arall, neu a yw'n destun cais cofrestru o'r fath;
- (c) enw arfaethedig; a
- (d) y cyfryw wybodaeth arall sy'n ofynnol gan Weinidogion Cymru.

(3) Pan fo'n gymwys, caniateir i gais fynd gyda manylion disgrifiad swyddogol a bennir gan awdurdod cyfrifol mewn man arall yn y Deyrnas Unedig neu mewn Aelod-wladwriaeth arall.

Cofrestru

3.—(1) Rhaid i Weinidogion Cymru gofrestru amrywogaeth â disgrifiad swyddogol os ydynt wedi eu bodloni—

- (a) bod yr amrywogaeth yn wahanol, yn unffurf ac yn sefydlog;
- (b) bod sampl o'r amrywogaeth ar gael; ac
- (c) mewn perthynas ag amrywogaethau a addaswyd yn enetig, fod yr organedd a addaswyd yn enetig sy'n ffurfio'r amrywogaeth wedi ei awdurdodi i'w dyfu yn unol â Chyfarwyddeb 2001/18/EC neu Reoliad (EC) Rhif 1829/2003.

(2) Rhaid i Weinidogion Cymru dderbyn bod amrywogaeth yn wahanol, yn unffurf ac yn sefydlog ar sail canlyniadau treialon tyfu yn unol â pharagraff 6.

(3) Nid yw'n ofynnol cynnal treialon tyfu pan fo Gweinidogion Cymru wedi eu bodloni, ar sail yr wybodaeth a gyflwynir gan y cais, fod disgrifiad swyddogol a bennir gan gorff swyddogol y tu allan i Gymru yn bodloni'r amodau cofrestru sy'n ofynnol gan is-baragraff (1).

(4) Caiff Gweinidogion Cymru gofrestru amrywogaeth sydd wedi ei marchnata o fewn yr Undeb Ewropeaidd cyn 30 Medi 2012 ar yr amod bod gan yr amrywogaeth ddisgrifiad a gydnabyddir yn swyddogol.

Cofrestr amrywogaethau

4.—(1) Rhaid i Weinidogion Cymru gynnal a chyhoeddi cofrestr o amrywogaethau ("y gofrestr").

(2) Rhaid i'r gofrestr gynnwys yr wybodaeth a ganlyn ar gyfer pob amrywogaeth gofrestredig—

- (a) enw'r amrywogaeth a'i chyfystyron;
- (b) y rhywogaeth y mae'r amrywogaeth yn perthyn iddi;
- (c) y dynodiad 'official description' neu 'officially recognised description', fel y bo'n briodol;
- (d) y dyddiad cofrestru neu, pan fo'n gymwys, ddyddiad adnewyddu'r cofrestriad;
- (e) dyddiad dod i ben dilysrwydd y cofrestriad.

(3) Rhaid i Weinidogion Cymru hefyd, mewn perthynas â phob amrywogaeth a gofrestrir, gadw ffeil sy'n cynnwys disgrifiad o'r amrywogaeth a chrynodeb o'r ffeithiau sy'n berthnasol i'w chofrestriad.

Gofynion ychwanegol ar gyfer cynnyrch sydd i'w defnyddio fel bwyd neu fwyd anifeiliaid a addaswyd yn enetig

5.—(1) Mae'r paragraff hwn yn gymwys i unrhyw amrywogaeth y mae cynhyrchion sydd i'w defnyddio fel y pethau a ganlyn, neu yn y pethau a ganlyn, yn deillio ohoni—

- (a) bwyd o fewn cwmpas Erthygl 3 o Reoliad (EC) Rhif 1829/2003; neu
- (b) bwyd anifeiliaid o fewn cwmpas Erthygl 15 o Reoliad (EC) Rhif 1829/2003.

(2) Cyn cofrestru unrhyw amrywogaeth o'r fath, rhaid i Weinidogion Cymru fod wedi eu bodloni bod y bwyd neu'r bwyd anifeiliaid wedi ei awdurdodi yn unol â Rheoliad (EC) Rhif 1829/2003.

(3) Pan fo'n ofynnol cynnal treial tyfu, rhaid cyflwyno sampl o ddeunyddiau'r amrywogaeth ar gais.

Treialon tyfu

6.—(1) Caniateir cynnal treialon tyfu—

- (a) gan Weinidogion Cymru;
- (b) ar ran Gweinidogion Cymru yn unol â'r trefniadau ar gyfer mesurau swyddogol a wneir o dan reoliad 27; neu
- (c) gan awdurdod cyfrifol mewn man arall yn y Deyrnas Unedig neu mewn Aelod-wladwriaeth arall.

(2) Rhaid i dreialon tyfu—

- (a) cadarnhau a yw amrywogaeth yn wahanol, yn unffurf ac yn sefydlog; a
- (b) cael eu cynnal, o ran cynllun y treialon, yr amodau tyfu a nodweddion yr amrywogaeth o dan sylw, yn unol â'r protocol priodol.

Parhad cofrestriad ac adnewyddu cofrestriad

7.—(1) Mae cofrestriad amrywogaeth yn ddilys—

- (a) yn achos amrywogaeth a addaswyd yn enetig, am y cyfnod y mae'r organedd a addaswyd yn enetig sy'n ffurfio'r amrywogaeth wedi ei awdurdodi i'w dyfu yn unol â Chyfarwyddeb 2001/18/EC neu Reoliad (EC) Rhif 1829/2003; neu
- (b) fel arall hyd at ddiwedd y 30ain blwyddyn galendr ar ôl y dyddiad derbyn.

(2) Ond nid yw is-baragraff (1) yn gymwys os yw'r cofrestriad—

- (a) yn cael ei adnewyddu yn unol ag is-baragraff (3) neu (4) (fel y bo'n briodol);
- (b) yn cael ei ddirymu yn unol â pharagraff 8.

(3) Yn ddarostyngedig i is-baragraff (4), caiff Gweinidogion Cymru, ar sail cais ysgrifenedig, adnewyddu'r cofrestriad am gyfnod pellach o 30 o flynyddoedd—

- (a) os yw'r amrywogaeth yn wahanol, yn unffurf ac yn sefydlog;
- (b) os oes deunyddiau o'r amrywogaeth honno ar gael ar y farchnad.

(4) Yn achos amrywogaeth a addaswyd yn enetig—

- (a) rhaid i unrhyw achos o adnewyddu cofrestriad fod yn ddarostyngedig i amod bod yr organedd a addaswyd yn enetig priodol yn parhau i fod wedi ei awdurdodi i'w dyfu yn unol â Chyfarwyddeb 2001/18/EC neu Reoliad (EC) Rhif 1829/2003;
- (b) rhaid i'r cyfnod adnewyddu fod yn gyfyngedig i gyfnod awdurdodi'r organedd a addaswyd yn enetig o dan sylw.

(5) Yn ddarostyngedig i is-baragraff (4), caiff Gweinidogion Cymru adnewyddu'r cofrestriad heb gais ysgrifenedig os ydynt wedi eu bodloni bod adnewyddu yn gwarchod amrywiaeth enetig a chynhyrchu cynaliadwy.

Dileu o'r gofrestr

8.—(1) Rhaid i Weinidogion Cymru ddirymu cofrestriad amrywogaeth—

- (a) os nad yw'n wahanol, yn unffurf neu'n sefydlog mwyach;

Statws This is the original version (as it was originally made).

- (b) os nad oes unrhyw ddeunydd o'r amrywogaeth honno ar gael mwyach sy'n ddigon unffurf neu sy'n cyfateb i'r disgrifiad o'r amrywogaeth ar yr adeg y'i cofrestrwyd;
 - (c) os darparwyd gwybodaeth anwir neu gamarweiniol sy'n berthnasol i gofrestru i Weinidogion Cymru mewn cysylltiad â'r cais i gofrestru;
 - (d) yn achos unrhyw amrywogaeth a addaswyd yn enetig, os yw'r organedd a addaswyd yn enetig sydd wedi ei gynnwys yn yr amrywogaeth yn peidio â bod yn awdurdodedig yn unol â Chyfarwyddeb 2001/18/EC neu Reoliad [\(EC\) Rhif 1829/2003](#).
- (2) Ond nid yw is-baragraff (1)(a) i (c) yn gymwys os yw Gweinidogion Cymru wedi eu bodloni y dylai'r amrywogaeth barhau ar y gofrestr er budd gwarchod amrywiaeth enetig amrywogaethau.